

四庫全書

集部

欽定四庫全書

御訂全金詩增補中州集卷五

張祕書斛 一十八首

斛字德容漁陽人仕宋為武陵守國初理索北  
歸官祕書省著作郎有南游北歸等詩行於世  
漁陽有峒陽故詩中多及之如賦小孤山云天  
圍秋漲濶山背夕陽孤岸樹晴猶溼汀煙近却  
無巫山對月云雲開千里月風動一天星河池

出郭云細草沙邊樹踈煙嶺外村中江縣樓云  
綠漲他山雨青浮近市煙中秋云月色四時好  
人心此夜偏松門峽云春木有秀色野雲無俗  
姿賦禮部侍郎張浩然遼海亭云晴光揺碧海  
遠色帶滄洲又賦臨漪亭云雨聲喧暮島水色  
藉秋空秋興樓云碣石晚風催鴈急昭祁寒漲  
與雲平人多誦之予嘗見其文筆字畫皆有前  
輩風調宇文太學甚激賞之

沙邊

晚雨漲平堤沙邊獨杖藜長風催鴈北衆水避潮西楚  
客相逢少吳天入望低故園無路到春草自萋萋

東川春日

巴蜀三年客江湖萬里情滄波何處盡歸棹幾時行世  
態浮雲變春愁細草生羣山遮望眼片月上高城

巫山對月懷湖外親友

衆壑斂新雨孤舟增暮寒巫山今夜月湘水幾人看不

得臨湖醉惟愁下峽難雙魚憑寄遠尺素勸加餐

武陵春雪

天風吹雪滿千山不見桃花汎碧瀾洞裏仙人貪種玉  
豈知人世有春寒

盧臺峭帆亭

高秋客未還何處望鄉關喬木蒼烟外孤亭落照間雨  
晴山覺近湖滿水如間目斷峒陽路歸雲不可攀

高寺

高寺鳴鐘後孤舟落鴈邊  
已知歸徑晚故就上方眠  
石峻溜聲急月高松影圓  
明朝下烟靄迴首阻清川

寓中江縣樓

武江斜轉石文岫獨參天

江曰玄武山曰文達

綠漲他山雨青浮

近市烟松薪炊白粲水蔓繫紅鮮  
自喜飄蓬跡安居過兩年

迴文二首

野曠悲行客湍驚礙去船  
夜江清泛月秋草碧連天

綠逕斜縈草紅梢半落花曲池風碎月歌岸雨摧沙

仙門驛聽泉

一亭圍古木雙澗瀉清流行到雲山暮卧聞風雨秋客  
塵何日浣病渴此時瘳歸去南溪上輕舟細浪浮

夜雨南山

雨夜宿山齋夜深雨聲息石室含餘清風枝墮殘滴

平安關道中二首

高林俯青冥柯葉森若織陽光已轉千陰嶺仍半黑崢

嵒亂石間行子有苦色臨深地勢入涉險天宇塞四顧  
無所投迹重去未息悵然增百憂冥冥羨歸翼

窮冬十日陰積雪千山路晴雲開半嶺落日猶在樹悠  
悠客心速慘慘天色暮寒鳥各有依解鞍尚無處游魚  
誤銜鈎玄豹終隱霧行行謝冠冕復我林壑趣

將渡江

無數飛花委路塵不堪重醉楚城春明朝回首江南岸  
烟雨昏昏不見人



還家

雲林無俗姿相對可終老如何塵中人不見青山好

訪香林老

風雨無時浪蹴天南浮舟揖信多艱半生夢破寒江月  
萬里春回故國山歸客自傷青鬢改高僧長共白雲閒  
誅茅藉我溪西地未厭相從水石間

海邊亭為浩然賦

夙有滄洲趣雲扃夢幾回臨深疑地盡望遠覺天開月

湧冰輪出濤翻雪陣來無機同海客鷗鳥莫相猜

南京遇馬丈朝美

浮雲久與故山違茅棟如存尚可依  
行路相逢初似夢  
舊游重到復疑非  
滄江萬里悲南渡  
白髮幾人能北歸  
二十年前河上月  
尊前還共惜清輝

蔡丞相松年 五十九首

松年字伯堅父靖宋季守燕山仕國朝為翰林  
學士伯堅行臺尚書省令史出身官至尚書右

丞相鎮陽別業有蕭閒堂自號蕭閒老人薨諡  
文簡百年以來樂府推伯堅與吳彥高號吳蔡  
體有集行於世其一自序云王夷甫神情高秀  
宅心物外為天下稱首言少無宦情使其雅詠  
玄虛不經世務超然遂終其身則亦何必減嵇  
阮輩而當衰世頽俗力不可為之時不能遠引  
高蹈顛危之禍卒與晉俱為千古名士之恨又  
嘗讀山陰詩引考其論古今感慨事物之變既

言修短隨化期於共盡而世殊事異興懷一致  
則死生終始物理之常正當乘化歸盡何足深  
歎乃區區列叙一時述作刊紀歲月豈逸少之  
清真簡裁亦未盡忘情於此耶故因作歌併及  
之好問按此歌以離騷痛飲為首句公樂府中  
最得意者讀之則其平生自處為可見矣二子  
珪字正甫璋字特甫俱第進士號稱文章家正  
甫遂為國朝文宗特甫非其比也自學士至正

甫皆有書名其筆法如出一手前輩之貴家學  
蓋如此

晚夏驛騎再之涼陘觀獵山間往來十有五日因

書成詩

兜羅蔥鬱浮空青曉日馬頭雙眼明名山不作世俗態  
千里傾蓋來相迎老松閱世幾十尺玉骨冷風戰天碧  
應笑年年空往來塵土勞生總陳迹山回晚宿一川花  
翦金裁碧明烟沙寒鄉絕艷自開落欲慰寂寞無流霞

明日行營獵山麓古樹寒泉更深綠強臨冰玉照鬢毛  
只恐山靈怪吾俗陂潮不盡水如天清波白鷗自在眠  
平時朝市手遮日思把一竿呼釣船驛騎回時山更好  
過雨秋容淨如埽山英知我宦游心為出清光慰枯槁  
可憐歲月易侵尋慙愧山川知我心一行作吏豈得已  
歸意久在西山岑他年俗累麓能畢雲水一區供老佚  
舉杯西北酌山川為道此言吾不食

漫成

人生各有適一受不可更違已欲徇世憂患常相嬰三  
軍護漢將九鼎調蒼生功名豈不美強之輒無成朝昏  
忘寢食俯仰勞心形何如從所好足以安餘齡予也一  
丘壑野性真難名力懦謝提劍才拙慙窮經踈放已成  
僻紛華誰與爭驚鹿便草豐白鷗願江清不堪行作吏  
萬累方營營夜慮多俗夢曉枕無餘醒拄頰西山語適  
意千里羹塵土走歲月秋光浮宦情欲語箇中趣知音  
耿晨星世途古今險方寸風濤驚封侯有骨相使鬼須

銅腥誓收此身去田園事春畊

淮南道中五首

南楚二月雨淮天如漏卮畏途泥三尺車馬真難棲却  
思間居樂雨具無所施高枕聽簷聲爐烟暈如絲

吾年過五十所過知前非顏鬢日蒼蒼老境行相追擇  
擇聽俯仰隨人欲何為歸計忽悠悠出處吾自知

南渡國不競晉民益瘡痍陶翁遂超然不忍啜其醜北  
牕談清風慨望羲皇時道喪可奈何抱琴酒一卮



三年鎮陽遊春歸綠扶踈櫻筍媚園林日長閒枕書行  
復當此時涼塵暗歸塗會洗醪醲雪月波浮玉壺

鎮陽亘西南山河在圖畫花雨草烟間人家或僧舍經  
行每悵然真賞知未暇待子籃輿歸香火復蓮社

丁巳九月夢與范季霑同登北潭之臨芳亭覺而  
作詩記其事以示范

高陵五六松潭水涵清陰白鳥如避世巢居得幽深雜  
花眩青紅苦節方森森何人作虛亭想像雲棲心我夢

涉陳迹君亦同登臨相與定嘉名洗去花草淫看雲撫  
修碧夕景低遙岑風林淡秋月霜枝鳴玉琴兩意誰識  
之好處煩幽尋閒居志則同歲月能駸駸時無陶彭澤  
此曲難知音亭前有竒石遷流失山林顧亦如我曹鬢  
髮風沙侵小兒重外物列屋享千金區區心甚長因循  
困華簪忽焉事大謬危機恐難任平生下澤車斯言吾  
所欽志士願不辱俗情使孔壬自喜迹猶淺鳧鴈容浮  
沉沉行自蕭散世路皆崎嶇此邦真可老城郭環清潯

結廬與君俱開寫平生襟里巷日還往杖屨行謳吟還  
尋夢遊處無忘神所歲

庚申閏月從師還自潁上對新月獨酌十三首

伊昔三年前淫雨催行輶青燈忽今夕華屋暎高秋華  
屋亦何為百年竟山丘適意在歸與肉食非我謀

大塊本何事遑遑勞一生所過總陳迹歲月如流星貪  
夫甘死禍幅紙馳虛名晉室有先覺柴桑老淵明

我家恒山陽山光碧無賴月窟陰風篁十里瀉澎湃茲

焉有樂地不去欲誰待自要塵網中低眉受機械

人言歸甚易但苦食不足必使極其求萬鍾不盈腹處  
世務所安無禍即無福却視高蓋車身寵神已辱

我本山澤人孤烟一輕蓑功名無骨相彫琢傷天和未  
能遽免俗尚爾同其波梧桐喚歸夢無奈秋聲何

孟夏幽州道上陘車輾轉旌旗却南行飛電隨馬足行  
窮清潁水不辦洗蒸溽吾生豈匏瓜一笑為捧腹

燈花何太喜似報天雨霽客情念還家如瞽不忘視到

家問松菊早作解官計青鏡髮蕭蕭及此霜雪未

鳴蛙屬官私庸兒固可笑江山本誰爭但苦歸不早物  
情閒始見宛轉為君好區區之鑑湖多事憐賀老

天下任之重人物古難得誰為經濟才有亦未易識吾  
曹與雞鶩官倉等伏食行將問征途滿眼西山碧

懦微莫如我往往從險艱譬之驅山麋八鑿困天閑豈  
惟物違性成功亦良難風煙念何地野水長松間

出處士大節倚伏殊茫茫絕交苟不作自足存嵇康哲

人乃知機曲士迷其方顧我類社櫟匠石端相忘

問舍前年秋已買潭西地高明鬼所瞰聊取風雨蔽瀕  
溪樹嘉木成陰十年計仍當作茅舍名之以今是

斯言已詭詭要未離憂患何時但飲酒臧否了不關不  
飲逝者多秋草麒麟間懷哉竹林人吾方仰高山

七月還祁

洪河注天南兵氣橫高穹我從兵前來歸心疾驚鴻官  
柳未搖落蓮苻香濛濛吏舍在前村舊年養踈慵爰自

三軍去青苔瘞人蹤夕陽叩柴門歡迎來僕僮濁酒古  
罍洗停觴問新松却對一牀書睡鴨孤烟中土花暈湖  
玉冰絃冷霜桐燈火未可親露坐茅堂東西山月中淡  
夜茶煮松風到牀便安寢不復知晨鐘平生幽棲心斯  
言畧形容人道動有患百態交相攻而我觸類真冶容  
鄙青紅非才見臨事叩之輒空空知難不知回飄流劇  
飛蓬暫去聲利場樂佚猶無窮沉於得行意瀟灑畢此  
躬勿為才者縛從渠作夔龍

庚戌九日還自上都飲酒於西巖以野水竹間清  
秋巖酒中綠為韻十首

雞羣媚獨梁老鶴日踈野人言隨其流故有不同者  
骨相乃封侯銅腥能使鬼文章亦可憐不直一杯水  
在昔安九鼎功名照帛竹貞觀用玄齡一士天下足  
憂國在肉食斂玉莪清班吾曹漫浪人合眼松雲間  
閒居度重九昔賢愛嘉名霜菊有正色糟牀逢聖清  
平生一丘壑晚墮法家流一點無俗物今年真好秋



謝公既經世永懷東西巖翠袖亂清光輕雲點風鬟  
我得秋風暇鱸魚一杯酒佳人發浩歌此樂真不朽  
去年哦新詩小山黃菊中年年說秋思遠目驚高鴻  
避哉生處樂陵谷異風俗南枝吾永安笑撫西巖綠

小飲邢巖夫家因次其韻

東風初度野梅黃醉我東山雲霧牕只今相逢暮春月  
夜牀風雨翻寒江人生離合幾春事霜雪行侵青鬢雙  
大梁一官且歸去酒腸雲夢吞千缸

初卜潭西新居

喬木千章畫不如白鷗烟雨到江湖誰為求仲營三徑  
竊比揚雄有一區故國興亡樹如此他年聲利蔓難圖  
屋西便與秋山約莫遣歸來見白鬚

寄王仲侯

冰簟風簾水閣重月華清浸雪芙蓉誰教賧馬三十里  
好在行雲第幾峰酒市烏紗懷李白仙人鶴氅看王恭  
拍浮花裏知恩否寄與新詩洗醉悰

有本事可  
發一笑

讀踈詠之安陽對竹二詩懷家山次韻見意

短髮新霜及未侵幾年和月買泉林偶然行李對寒碧  
憶得故園驚歲陰枕上秋嵐吹醉夢門前沙鳥立清深  
箇中須著脩脩玉落日微風伴我吟

和子文寒食北潭

夢裏潭光翠欲流何時春水一虛舟吾廬想見扶踈樹  
宦意渾如浩蕩鷗聞道西山明酒面應無外物到眉頭  
別來誰唱驚人句十里珠簾有莫愁

雪晴呈玉堂諸公

雪晴松頂玉欄斑  
曉眼清於化鶴山  
欲立凍雲搜傑句  
却思仙客退清班  
瓊瑜帳底沉香火  
蒼蘂花中碧霧鬟  
喚取廣寒修月手  
月波千丈捲春還

和子文晚望

醉眼郊原感慨生  
夕陽長向古今明  
高人法士互憎愛  
美酒空名誰重輕  
二頃只謀他日老  
五絃猶喜晚風清  
因君欲賦思歸樂  
安得穿雲一笛橫

兵府得告將還鎮陽府推官王仲侯以書促予命  
駕先寄此詩

老驥心疲十二閑天教洗眼小江山名園無處不宜酒  
勝日有朋方解顏老木溪光留月駐禪房竹徑約花關  
先憑樂府求風骨或有佳人字玉環

渡混同江

十年八喚清江渡江水江花笑我勞老境歸心質孤月  
倦遊陳迹付驚濤兩都絡繹波神肅六合清明斗極高

湖海小臣尸厚祿夢尋烟雨一漁舫

初至尊化

出山風物便清和森木如雲秀靄多白水臨流照踈鬢  
青門折柳記柔柯重遊化國驚歲月有象豐年占麥禾  
亦有黃公酒壚在微官自要阻山河

黃海棠

清陰不歎晚尋芳縹緲細雲翠袖長萼綠江花輸帶葉  
醉紅蜀艷恨無香南州氣味連三月東晉風流共一觴

老眼寒來易愁絕  
溫柔乞與醉中鄉

夜坐

吾生有幾事無涯  
清夜漫漫歎物華  
但願聞鉦似疲馬  
可能粘壁作枯蝸  
只今雪屋重衾溼  
去歲梅溪醉帽斜  
終得蕭閒對牀語  
青燈挑盡短檠花

槽聲同彥高賦

槽牀過竹春泉句

聚簷秋雨喧踈溜  
過竹春泉咽暗冰  
門巷蕭條三尺雪  
琴書寥落一龕燈

彥高他日人云吾亦云  
自愛淳音含太古  
誰傳清溜入詩也

南薰秋風幾共橙香注曉月曾和鶴唳聞我欲婆娑竹  
林國洗空塵耳正須君

韓侯晁仲許送名酒渴心生塵以詩促之

好在銀餅秋露光藉君雲夢到枯腸解澆萬里客愁破  
暫吐十年黃卷香江水苦搗梁苑夢海棠新學漢宮粧  
天東四月春如許坐待白衣投醉鄉

步尋野卉

風烟草木照人明神藥竒花問識名聞道東州有仙窟



欲尋根撥學長生

癸丑歲秋郊

漫漫黃雲水清淺碧花無數亂鳴螿此生愈覺田園樂  
夢裏曉山三四峯

入關宿昌平

黃塵却送入關山自斷何如二頃田記得鳴螿碧花句  
蹉跎秋思又三年

秋日

風螢開闔度松陰松下飄然倦客心  
幾點清光照涼夜  
何時遠寺得幽尋

高麗館中二首

蛤蜊風味解朝醒松頂雲癡雨不晴  
悄悄重簷斷人語  
碧壺春筍更同傾

晚風高樹一襟清人與縹緲相照明  
謝女微吟有深致  
海山星月總關情

西京道中

來時綠水稻如鍼歸日青梢沒鶴深莫忘共山買田約  
藕花相間柳陰陰

銀州道中

小渡霜螯賤於土重巖野菊大如錢此時最憶涪翁語  
無酒令人意缺然

高昌館道中

雨餘巖石古苔青松裏珠璣萬葉明渺渺綠畦看鷺立  
深深清樾有蟬鳴

黃海棠

輕如紅豆排冰雪一拂新鶯色更奇不覺濃陰破明玉  
有情誰解賞離披

梅花

的爍橫枝愛老崔一尊長對畫圖開此生端有梅花分  
閒遠春風入手來

閒居漫興

歸田不早計歲月易云徂但要追蓮社何須賜鏡湖簿

書欺俗吏繩墨守愚儒安得如嵇阮相從興不孤

師還求歸鎮陽

春風卷甲有歡聲漸識天公欲諱兵節物無情新歲換  
男兒易老壯心驚落身世網癡仍絕挂眼山光計未成  
聞道恒陽似江國一官漫學阮東平

御訂全金詩增補中州集卷五

欽定四庫全書

御訂全金詩增補中州集卷六

高內翰士談 三十首

士談字子文一字季默宋韓武昭王瓊之後宣  
和末任忻州戶曹仕國朝為翰林直學士皇統  
初預宇文太學之禍有蒙城集行於世如云寒  
花貪晚日瘦竹強秋霜又題禹廟云可憐風雨  
胼胝苦後世山河屬外人時人悲之子公振字

特夫亦有詩名

梨花

中原節物正梨花配寒食黃昏一雨過滿地嗟狼籍塞垣春已深花事猶寂寂朝來三月半初見一枝白爛熳雪有香瓏鬆玉仍刻芳心點深紫嫩葉裁輕碧懶慢不出門雙餅貯春色殷勤遮老眼邂逅慰愁夕一樽對花飲況有風流客酒闌思故鄉相顧空歎息

將赴平陽諸公祖席分韻作

灞橋波似箭南浦草如裙此夜燈前淚他年日暮雲醉  
和醒一半悲與笑相分莫作陽關疊愁多不忍聞

予所居之南下臨短壑因鑿壁開牕規為書室坐  
獲山林之趣榜曰野齋且作詩約諸友同賦

我本麋鹿姿強服冠與簪束縛二十年夢寐遊山林竭  
來古晉國官舍南城陰鑿壁取軒豁開牕舒滯淫山光  
射几席野色供登臨怡顏盼庭柯明目增遙岑草木遞  
榮落雲烟自浮沈玩彼物色變感此歲月侵兀坐獨無



人窺簷轉幽禽誰知城市中闌若郊居深巷陋顏子樂  
地偏陶令心一室亦何有狼籍書與琴晴暉朝徙倚皎  
月夜相尋欲賦畔牢愁先為梁父吟詩成輒自和酒熟  
時孤斟結茅會有期種竹當及今日來官更忙塵埃滿  
衣襟暮歸唯憊卧筋力殊不任常思返丘壑豈願紆朱  
金遙知北山處猿鶴餘清音

春愁曲

壓花曉露萬珠冷金井呶啞轉纖縷寶堦寂寂苔紋深

東風搖碎湘簾影芙蓉帳暖春眠重  
牕外啼鶯喚新夢  
推枕起來嬌翠顰一線沈烟困金鳳  
游絲飛絮俱悠颺  
慵倚繡牀春晝長  
郎馬不嘶芳草暗  
半篩急雨飛橫塘

次韻東坡定州立春日詩

柳色看猶未梅花折已堪  
流年空客恨舊事與誰談  
落日窺愁絕東風半醉酣  
雲深歸曉鴈水暖浴春蠶  
從事終無愧空餐色有慙  
家山方杳杳官府謾  
單隱几心猶靜  
焚香鼻觀參語新  
憐鵲喜聲鄙惡鴟貪  
迹迹何時

定歸心不厭南佳辰近燒燭盛事憶傳柑學業虛千卷  
生涯寄一庵誰能弔雙影無月不成三

集東坡詩贈程大本

十圍便腹貯天真謀道從來不計身公業有田常乏食  
陶潛無酒亦從人異同更莫疑三語饑飽終同寓一塵  
待我南遊載君去扁舟歸釣五湖春

曉起戲集東坡句二首

簾紋如水帳如烟一榻清風直萬錢困卧北牕呼不起

老夫風味也堪憐

清風終日自開簾  
吏散空庭雀噪簷  
午醉醒來無一事  
地偏心遠似陶潛

秋興

鼓角邊城暮關河古塞秋  
淵明方止酒王粲亦登樓  
搖蕩傷殘歲棲遲憶故丘  
乾坤尚傾仄吾敢歎淹留

村行

墟落依林莽茅廬出短墻  
兒童避車馬父老饋壺漿  
半

濕田新雨猶青棗未霜逢人問豐歉一一歎聲長

不眠

不眠披短褐曳杖出門行月近中秋白風從半夜清亂  
離驚昨夢漂泊念平生淚眼依南斗難忘去國情

秋晚書懷

肅肅霜秋晚荒荒塞日斜老松經歲葉寒菊過時花天  
濶愁孤鳥江流憫斷槎有巢相喚急獨立羨歸鴉

早起

曉起先烏鵲愁多竟不眠  
風霜嚴塞草星月淡秋天落  
葉親攜帚垂瓶自汲泉  
禁門朝萬馬魂斷憶當年

春日

遲日回輕暖東風掃積陰  
客愁眉上見春意柳邊尋  
健犢躬耕計歸鴻去國心  
醉鄉如可隱會放酒杯深

庚戌元日

舊日屠蘇飲最先而今追想尚依然  
故人對酒且千里春色驚心又一年  
習俗天涯同爆竹風光塞外只寒烟

殘年無復功名望志在蘇君二頃田

次伯堅韻

公道向來惟白髮浮生何處用黃金東風吹散三年恨  
春色驚回萬里心急景只教人貌改滄溟不放酒杯深  
異時儻及公榮酌準擬歸來卧柳陰

次韻飲巖夫家醉中作

月中招得飲中仙草露吹風灑靜便地有溪山真可樂  
人如冰雪自無眠清新李白詩能勝勃率張憑理最玄

功業本非吾輩事此身聊復鬪尊前

晚登遼海亭

登臨酒面灑清風竟日憑欄興未窮殘雪樓臺山向背  
夕陽城郭水西東客情到處身如寄別恨他時夢可通  
自歎不如華表鶴故鄉常在白雲中

風雨宿江上

風雨蕭蕭作暮寒半晴烟靄有無間殘紅一抹沈天日  
濕翠千重隔岸山短髮不羞黃葉亂寸心常羨白鷗閒



濤聲午夜喧孤枕夢入瀟湘落木灣

隸棠

閒庭隨分占年芳  
裊裊青枝淡淡香  
流落孤臣那忍看  
十分深似御袍黃

雪

蔌蔌天花落未休  
寒梅踈竹共風流  
江山一色三十里  
酒力消時正倚樓

苦竹

密葉修莖雨後新  
肯因憔悴損天真  
清如南國紉蘭客  
瘦似西山採蕨人

睡起

平生心性樂踈慵  
多病追歡興亦空  
睡起不知春已老  
一簾紅雨杏花風

揚花

來時官柳萬絲黃  
去日飛毬滿路傍  
我比揚花更飄蕩  
揚花只是一春忙

此詩亦嘗載摘林集中然子文集是其子特夫手錄恐無悞收者故從之

道中

鳴鳩逐婦婦欲去燕子引雛雛不來樹底樹頭千點雨  
山南山北一聲雷

丙寅刑部中二首

世事邯鄲枕歸心渭上舟釁來無朕兆意外得俘囚忠  
信天堪仗清明澤自流藜羹猶火食差勝絕糧愁

幽囚四十日坐穩穴藜牀縲紲元非罪艱難已備嘗全  
家音頓阻孤枕夢難忘會有相逢日牽衣話更長

二月十一日見桃花

鳴鳩天色半陰晴  
竹屋松牕老寸心  
閉戶不知春早晚  
桃花紅淺柳青深

志隱軒

家居瀟灑似江村  
花草侵階水映門  
元亮結廬山挂眼  
孔融好客酒盈樽  
肯教軒冕移心志  
未厭林泉入夢魂  
我亦平生倦游客  
一屨無處問東屯

偶題

羨他田父老於農遠是莊西與舍東不似宦游情味惡  
半生常在別離中

附書史會要士談善草書

馬御史定國 三十一首

定國字子卿在平人唐中令周裔孫少日志趣  
不凡宣政末題詩酒家壁有蘇黃不作文章伯  
童蔡翻為社稷臣之句用是得罪亦用是得名  
阜昌初遊歷下亭以詩撼齊王豫豫召與語大

悅授監察御史仕至翰林學士石鼓自唐以來  
無定論子卿以字畫考之云是宇文周時所造  
作辨餘萬言出入傳記引據甚明學者以比蔡  
正甫燕王墓辨初學詩未有人處夢其父與方  
寸白筆從是文章大進自號齋堂先生有集傳  
於世

宿田舍

狂風作帚掃春陰投宿田廬話古今樽俎只如平日事

干戈方識故人心淒涼一樹梅花發迤邐千門柳色深  
天子蒙塵今不返酒酣相對泣沾襟

清平道中

棘林苦苜野花黃一馬駸駸渡灤陽別墅酒旗依古柳  
點溪花片落新香伏波事業空歸漢都護田園不記唐  
今日清明過寒食又將書劍客他鄉

登歷下亭有感

男子當為四海遊又攜書劍客東州烟橫北渚芰荷晚

木落南山鴻鴈秋，富國桑麻連魯甸。用兵形勢接營丘，  
傷哉不見桓公業。千古遼城空水流。

長相思

歷歷春陽被羣木，白沙淺水明如鵠。結廬聊可障雨風，  
學道未能充耳目。故人家居紫翠傍，枳籬日落青山長。  
歲云晏矣不可見，望盡楚天飛鳥行。

客懷

結髮游荆楚，勞心惜寸陰。草長春逕窄，花落曉烟深。穀



早惟祈雨年饑不問金三齊雖淡薄留此亦何心

招康元質

此生住著定如何不傍耕疇即釣蓑北阜平蕪隨鳥遠  
東湖新漲與天多詩成重墨題飛葉睡起輕芒踏軟莎  
猶有客愁銷不盡風軒茶竈待君過

雨晴離開化寺

澗谷流秋水樓臺入暮寒連城遭雨積一日得泥乾利  
劍青蕉室名駒白鐵鞍回頭棲隱地風樹響珊珊

秋日書事

南山悠悠去天尺，雀寒未晚爭投棘。  
野人籬落不勝荒，溪欲絕流堆亂石。  
小園蔬藥知有無，未免杖藜煩兩屐。  
霧蒙甘菊細莖紫，風動牽牛晚花碧。  
鄰舍翁歸竹几空，秋天日落松牕寂。  
小杯翻酒足自娛，問巷浮沉真可惜。

讀莊子

吾讀漆園書，秋水一篇足安用。  
十萬言磊落載其腹，北風熟植梨。  
冷日照鴻鵠，人生固多事。  
端坐至秉燭。

雪霽

高巖旭日吐深頰  
雪霽樓臺白玉京  
獨往南塘探春色  
枇杷花下竹雞鳴

寒食

燕泥半落烏衣巷  
柳色全添綠綺牕  
且伴丁香過寒食  
弄晴蝴蝶一雙雙

揚休烈村居

籬落牽牛放晚花  
西風吹葉滿人家  
閉門久雨青苔滑

時見鴛鴦下白沙

游何氏園

八尺龍蛇薜荔牆  
瘦松踈竹更蒼涼  
梅花映水無人見  
隔岸飛來片片香

四月十日遇周永昌二首

竹裏涓涓雨未晴  
日高牕牖受虛明  
數家燕雀青雛出  
是處園林綠穎成  
貧覺酒盃真有味  
病思丘壑豈無情  
東山舊隱許相過  
他日秋原看耦耕

幼時種木已巢鳶猶向花前作酒顛郭外青山招曉出  
圃中明月照春眠世無蘇黃六七子天斷文章三十年  
今日逢君如舊識醉持杯酌望青天

過李湘

數樹高槐散乳鴉時於缺處見黃花涼風不斷如流水  
相對胡牀坐日斜

雪

紅樓翠瓦不禁寒欲剪梅花去路難淨埽竹亭聊飲酒

恰如明月照金盤

懷高圖南

劉又一狂士尚得韓愈知君才百劉又知者果其誰三  
隨計吏貢躡履游京師文章善變化不以一律持碧海  
涵萬類青天行四時去年高唐別河柳搖風枝今年清  
明飲高花見辛夷茲來又幾日軍檄忽四馳尺書無處  
寄相見果何期白日鬪龍蛇黃塵笳鼓悲春風獨無憂  
吹花發江湄一杯送歸雁萬里寄相思

送王松年之汶上

去去東平道飛轅不可攀地隣邦子國天近穆陵關問  
俗徵前事移家卜好山溪堂醉花月春興幾時還

香巖病中

九州四海盡行路萬戶千門非我家金彈不徒驚燕雀  
春雷終待起龍蛇

題崇子中庵

美君高節似陶潛五畝園林老不添遊世人情雖淡薄

開門秋色自清嚴  
案頭黃卷香終日  
砌下蒼苔雨一簷  
後夜中秋更應好  
隔牕雲木看飛蟾

郢州城西

秋江白水浪花簷  
墟落人歸鳥自呼  
新月高城三百雉  
角聲吹徹小單于

送圖南

壺觴送客柳亭東  
回首三齊落照中  
老去厭陪新客醉  
興來多與古人同  
戍樓藤角垂新綠  
山店擘花落細紅



他日詩名滿江海  
薺堂相見兩衰翁

秋日書事

井邊薺以吐秋珠  
舍下瓜區雜芋區  
世道未夷聊小隱  
不須辛苦著潛夫

村居五首

溪頭梅是去年花  
間日初長逕竹斜  
向晚孤烟三十里  
不知樵唱落誰家

蠶蛹成蛾桑柘稀  
海棠花發照牕扉  
離騷讀罷無人會

獨立溪南看夕暉

五月南風化蟪蛄野塘晚筍未成蒲擘花落盡紅英細  
沙渚鴛鴦半引雛


柿葉經霜菊在溪天寒落日見雞棲西家有客翦新酒  
紅葉蕭蕭蓋芋畦

歲暮行人竟不來空吟溪樹覓寒梅何時消盡關山雪  
收拾春風入酒杯

宣政末所作二首

蘇黃不作文章伯  
童蔡翻為社稷臣  
三十年來無定論  
到頭姦黨是何人

山杏山桃取次開  
紅紅白白上樓臺  
移將海底珊瑚樹  
乞與人家也不栽



御訂全金詩增補中州集卷六

欽定四庫全書

集部

御訂全金詩增補中州集卷七  
十五

詳校官中書臣張虎拜

主事銜臣徐以坤履勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷七

祝太常簡

一十二首

簡字廉夫單父人宋末登科國初倅某州仕至  
朝奉郎太常丞兼直史館有鳴鳴集行於世其  
詩說有云予政和丁酉任洺州教官是時括蒼  
鮑慎由欽止出所注杜詩說天王守太白守讀  
如狩於河陽之狩高秋登寒山南望馬邑州馬

邑州在城州界予檢唐書志寶應元年徙馬邑  
州於鹽井城欽止為有據矣舊注馬邑屬鴈門  
與杜子美作詩處全無關涉後人遂謂王源叔  
謬於牽引不知源叔初不注杜詩予識其孫彥  
朝彥朝不說杜詩非其大父注蓋彥朝不學見  
流俗皆讀舊注因而認有可歎可歎好問常以  
此問趙禮部趙云廉夫前輩必不妄試更考之  
今日見吳彥高東山集有贈李東美詩引云元

祐間秘閣校對黃本鄧忠臣字慎思余柳氏姨  
之夫今世所注杜工部詩乃慎思平生究竭心  
力而為之者鏤板家標題遂以託名王源叔翰  
林兩王公前後記初無一語及此注而後記又  
言如源叔之能文止作記於後則源叔不注杜  
詩為可見矣舉世雷同無為辨之者宣和近貴  
李東美有才藻善行書且喜作小楷所寫杜集  
精密道麗有足嘉賞為作古詩一篇紙尾因記

鄧公事後人聞此其誰不疑然予少時目擊不  
可不識姑以告李侯非求信後人也彥高此說  
正與廉夫合近歲得浙本杜詩是源叔之孫祖  
寧所傳前有序引備言其大父源叔未嘗注杜  
詩廉夫彥高益可信故併記於此廉夫詩甚工  
如賦雪云雪屋無寒夢油燈有細香書懷云白  
髮渾無賴朱顏更不回遮眼細書聊引睡扶頭  
濁酒最關情此類甚多



舟次丹陽

船頭東下趁晨鐘  
船外清霜氣暗通  
斷鴈聲歸烟靄裏  
孤帆影落月明中  
隋河波浪千年急  
梁苑池臺一半空  
試問碧堤無限柳  
敗條衰葉幾秋風

下第魚臺東寺

病眼逢花亦倦開  
流鶯飛去悞相猜  
多情却愛僧堂燕  
才得春風却再來

青奴

名實於人不可誣馬牛我亦受人呼世間物化多難曉  
誰為此君為此奴

雜詩二首

雨後清寒滿袖風鴈聲南去暮雲濃秋來杞菊能多少  
欲助盤食自不供

榴花嬌欲鬪羅裙石竹閒成碎纈文更有戎葵亦堪愛  
日烘紅臉酒初醺

虛極齋獨坐

虛齋長缺短燈檠  
明月當牕夜氣清  
却掩麈編時閉目  
胡牀獨坐聽秋聲

相國寺鐘

寒雞縮頸未鳴晨  
已聽春容入夢頻  
未必佛徒知警悟  
祇能喚起利名人

春日

鶯語相喧浩蕩春  
落花細點禁街塵  
游絲飛絮狂隨馬  
遲日和風欲醉人

夏雨

電掣雷轟雨覆盆  
晚來枕簟頗宜人  
小溝一夜水三尺  
便有蛙聲喧四隣

和常祖命二首

著書不得自名家  
卷裏蠅頭散眼花  
未用一杯張翰酒  
正須七椀玉川茶

操筆文章學古風  
平生羞與腐儒同  
相如雖有凌雲賦  
不及東方射守宮

檢旱

草樹連雲綠間黃年饑村落自荒涼晚蟬抱樹聲聲急  
野菊迎人細細香

附偽齊錄太常博士兼直史館祝簡進遷都賦  
其畧云炎祚燭生辟王用闔嬰錮忠良又進國  
馬賦其吠堯之言大畧云蠢爾蠻荆弗賓弗降  
固將突騎長驅不資一葦之航撒烈飛渡如歷  
九軌而履康莊豈惟觀兵長淮飲馬大江而止

哉蓋將窮丹穴越嶺徼車書混祝融之區聲教  
變卉服之島東南一尉罔不率俾四海聞盛德  
而皆徠臣萬物被潤澤而大豐美歸馬牧牛戢  
戈橐矢天子垂衣裳庶民安田里豫批云文賦  
正非治天下者所宜尚然自前朝之季上恬  
下嬉意國家創業力為殘弊生靈除禍亂圖康  
泰以馬為急務而猶恐官吏軍民多忸於舊俗  
未知收心於牧圉芻牧之道此賦極陳馬之為

用使讀之者皆知此為至重而不可忽實有補  
於馬政祝簡可減二年磨勘聊示無言不酬

張子羽三首

子羽字叔翔東阿人馬定國齋堂集載其師友  
六人其一香巖可道人題比陽道邊僧舍云  
山頭翠色僧房靜山下紅塵客路長五月行人  
汗如雨豈知高處有清涼其一鮮于可字東父  
蜀嘉州人從祖僖父之武皆有名於時東父詩

有小雨潤履綦花氣襲芳襟十里青山堪布履  
半篙春水已勝舟之句其一高鵬化字圖南平  
原人少有能詩聲如盤中酒影金蛇活與流虹  
聚石缸之句皆竒怪不凡其一王景微字彥美  
祁國文獻公溥之後贈定國詩云澗下松杉已  
蔽牛溪中蘋藻可供羞故鄉未有終焉計欲指  
吳山歸去休其一吳縝字子長東平人文肅公  
奎之孫年三十以食貧暫仕即歸隱于魚山狼



溪之側寄定國云情遲夏日流目斷晚雲碧新  
詩從何來遠自金馬客雄深作者意奔軼古人  
迹名高四海望髮未一莖白應嗤窮途士抽簪  
老泉石采蕨在南山驅牛向東陌勞生豈不苦  
衣食迫晨夕膏粱無宿懷茅茨得真適卒歲將  
何求一飽惟力穡訪國城石氏云昔我訪君處  
樹涼炎暑收今君訪我來城空殘雪留經時少  
乘興兩至皆空投茅茨隔溪上車馬度城頭不

聞機杼聲但聽溪水流向來方圓翁曾伴此中  
遊近聞大梁至京塵滿衣裘相思懶歸步落日  
風颼颼山居云西首魚山崦北連黃石祠崇岡  
在東南我家山北陞地僻少人事終朝掩柴扉  
樽酒不常得書卷聊自怡春風數日來處處生  
蒨薇寸心復何累一飽良可期當年終南人掟  
徑以貽譏知我無心者豈顧悠悠辭擬淵明貧  
居云淒其歲云暮北風無時休晨興倦薪水夜

寐乏衾裯缺月正裴回宿鳥頻啾啾欲無憔悴  
歎奈此霜霰秋松楸脫兵火環堵且淹留閉門  
念袁安守賤弔黔婁坐讀貧士詩吾乃淵明儔  
溪上招王仲先云幽居復何為冬來性成懶柴  
門俯清溪寸步出亦罕今晨偶携杖愛此晴日  
暖寓目隨所之行到南溪畔背陰雪猶積向暖  
冰全泮搯頤卧石上仰面蒼崖斷泉聲從何來  
乍喜兩耳換平分意甚遲斗落勢方悍坐來百

慮忘還惜日景短塵寰多憂虞中林足閒散故  
人戀明時歸休苦遲緩幅巾來何時臨流話幽  
歎叔翔亦其一也定國謂叔翔於文章無所不  
能嘗仕國朝官洛陽云

游龍門訪潛溪僧舍

入谷訪精舍鐘聲先遠聞陽光時翳竹泉脉俄當門山  
僧禁足久瞑目誦微言要知鹿臺守但指山頭雲策杖  
御栝西幽蘭秀荆榛風烟浩難及薄暮花紛紛

宿寶應

重巖烟靄合寶閣春風暮山深月影遲坐久識歸路伊  
昔府中彥征驂同夜駐徂年能幾時變滅等輕霧禪房  
伴茗飲豈待酒中趣卧來清不寐瘦鶴警宿露黎明覓  
舊題松間宛如故

又作已復  
等驚霧

壽張和滑益之

理髮秋庭趁夕陽靜中誰可共傳觴雲橫故國三年別  
水遶孤村六月涼病眼只貪書味永渴心頻夢摘奴香

魚山早有終焉計少日應容解印章

朱諫議之才 一十七首

之才字師美洛西三鄉人宋崇寧間登科入齊  
為諫官坐直言黜為泗水令尋乞間退寓居嵒  
陽因而家焉昆弟數人皆有文名師美自號慶  
霖居士有霖堂集傳於世如云魯甸分鴻影齊  
山入馬蹄門靜堪羅雀書成不換鷺雨過好花  
紅帶潤日長嘉樹綠移陰此類甚多子瀾字巨

觀

南越行

南越太后邯鄲女皓齒明眸照蠻土珊瑚為帳象作床  
錦繖高張擊銅鼓太液池內紅芙蓉自憐謫墮蠻烟中  
灞陵故人杳無耗深宮獨看南飛鴻隨兒作帝心不願  
惟願西朝柏梁殿茂陵劉郎亦可人遣郎海角來相見  
金猊夜燎龍涎香明珠火齊爭煌煌番禺秦甸隔萬里  
今夕得遂雙鴛鴦白首相君佩銀印干戈欲起蕭牆釁

莫言女子無雄心置酒宮中潛結陣漢家使者懦且柔  
織手自欲操霜矛孤鸞竟落老梟手可憐空奮韓千秋  
樓船戈鋌師四起或出桂陽下灘水越郎追斬呂嘉頭  
九郡同歸漢天子尉佗墳草幾番青霸業猶與炎洲橫  
玉璽初從真定得黃屋却為邯鄲傾五羊江連湘浦竹  
嬌魂應伴湘娥哭

後薄薄酒二首

薄酒可以謀醉不必霞滋玉味麤布可以御冬不必狐



貉蒙茸醜婦可以肥家不必楚女吳娃獨夫長夜商祚  
訖羲和酒淫紊天厯李白跌宕三百盃阮籍沈醬六十  
日眠甌吏部寡廉耻解貂常侍隳法律儻使飲薄酒未  
見有此失秦昭狐腋幾喪首鄭臧鷓冠貽厥咎厖裘金  
玦豈不哀繡衣朱褉固無取皆緣麤衣惡不御賈禍招  
譏亦何有夏姬滅兩國驪姬禍五世捧心顰眉亡夫差  
墮髻啼妝敗梁冀醜婦似可惡終不至顛沛勸君飲薄  
衣麓娶醜婦此樂人間最長久

薄酒簷衣吾何悲醜婦自醜吾不知道眼混圓宜不二  
嫩惡妍陋無殊歸瓦罌石臼斟吾酒脫粟藜羹皆可口  
醉境陶然無後憂玉盃浮蛆彼何有漢文天子猶衣絺  
士服簷布乃所宜要繩屐葛同一暖霧殺冰紈徒爾為  
無鹽如漆后齊宣孟光舉白配伯鸞古來傾城由哲婦  
有德乃令家國安我能遣婦縫簷對婦飲薄傍人大笑  
吾不惡

寓言二首

獸有善觸邪草有能指佞獸草非有心不移本天性前  
王著臣冠俾爾效端鯁如何不稱服觸指反忠正吾欲  
取二物豢置列臺省一令邪佞徒奔逃亟深屏

風雨晦時夜雞鳴有常聲霜雪枯萬幹松柏有常青內  
守初已定外變終難更若人束世利浮沉無定情俯仰  
效撐撐低昂甚權衡反出木鳥下徒為萬物靈

謝孫寺丞惠梅花

我來泗水上居與墟墓鄰彌望多棗栗礙眼皆荆榛忽

忽度歲月不知時已春朝來佳公子遺我梅花新秀色  
照牕几妙香襲衣巾莽如瓦礫場驚睹瓊瑤珍念昔客  
江南千樹臨江津吳儂不知貴但與桃李倫自從墮東  
土夢遶江之濱歎彼和鼎寶亦復生不辰窮愁坐空山  
豺虎雜鳳麟此贈意不淺難為俗子陳

次韻東坡跋周昉所畫欠伸美人

巫峽昭君有奇色毛生欲畫無由得但作東風背面身  
看來已可傾人國朝來睡起鬢髮垂手如春笋領螭螭

繡帷幽夢斷難續想像翠黛顰修眉春光三月濃於酒  
燕燕雙飛鶯喚友不教膩臉露桃花且喜腰肢似楊柳  
君不見漢宮多病李夫人轉面不顧君王嗔古來畫工  
畫意亦自足烟霧玉質何由真

### 暴雨

掣電奔雷晻靄間崩騰白雨襲人寒顏山黑霧傾濃墨  
倒海衝風瀉急湍勢似陽侯夸海若聲如項籍破章邯  
炎歊一濯須臾耳已看天圍碧玉寬

宿間廐

澹烟衰草慵回首  
晚日殘霞欲斷魂  
脫帽卸鞍投逆旅  
蕭蕭黃葉水邊村

十月十五日夜作連枝詩四首

披衣開戶幾宵興  
永夜無眠魂九升  
坐覺飛霜明瓦屋  
天如寒鑑月如冰

天如寒鑑月如冰  
僵卧家僮喚不應  
却憶少年游太學  
蕭然獨對短檠燈

蕭然獨對短檠燈引睡翻書睡幾曾自笑年來憂患熟  
跏趺真作坐禪僧

跏趺真作坐禪僧不學牕間故紙蠅湛若琉璃含寶月  
此中無減亦無增

卧病有感二十韻

舉蘇築園英澤芝紛水葉赤弁舞纖肌黃袍緩老頰鳴  
飛各有適吾獨嘆衰蒲齒髮久已疎又復失調燮梁肉  
謝鼎俎參苓富巾篋葵扇風未來挑笙汗初浹呻吟和

哀蟬夢寐追化蝶撫枕念平生世故飽更涉弱齡負竒  
志胸蛻盤煒晷夜篋傳巖訪朝待渭濱獵荀爽歲九遷  
康侯日三接功業著鐘鼎聲名垂史牒那知事大謬舉  
趾得躓踰多難集暮年百願無一愜寒灰消寸心清淚  
腐雙睫坐令孤鵬鶩化作瘴鴛鴦踔憂來復自慰人生幾  
蕩英呼吸過百歲俯仰失千劫乘流須縱擢遇坎即停  
揖些語不成騷商歌鼓長鈇

復用九日詩韻呈黃壽鵬



忽忽天星二十九當年曾醉瓊林酒

癸未歲登科第春  
適二十九年

春

風射策紫垣深猶記靈和殿前柳與君雖異千佛名出  
入南宮同戶牖春蠶食葉七千人看君運筆如揮帚妙  
齡忠氣軼衡嵩餘子紛紛直培塿那知晚節岱陽城白  
髮蒼顏兩閒叟君材有如萬斛舟顧我碌碌才笏斗時  
窮壯士或飯牛遇合封侯起屠狗東粵有田供王賦天  
寒且輟扶犁手寂寥圭竇對書冊火冷燈青夜方久先  
生乘興肯相過亦有青錢沽玉友

七夕長短言

牛不可以服箱女不可以成章其名則然實豈爾政如  
箕斗難挹揚河漢特水象安有波浪為津航惟鵲乃巢  
居詎能上天構橋梁星經有躔次東西永相望今夕復  
何夕乃謂合并如鸞凰一人唱誕惑萬世浪令兒女爭  
猖狂瓠牛載盤何等秩金梭擲地殊荒唐吾命有貴賤  
吾性本直方探官與乞巧是豈吾所臧何如舉酒邀明  
月更遣清風屏炎熱星光落盞黃金空露華摻袂真珠

滑我方幕天席地醉兀兀癡牛駸女知何物

水月有興

明月落湖水天淵體俱一浩蕩碧琉璃奩此寒玉璧微  
風觸湖波合散作六七浮光逐水紋金蛇勢盤結人心  
湛寂初與月同清質外累一汨之萬態紛殊迹因知養  
心者無為風浪失

劉內翰著 二十四首

著字鵬南舒州皖城人宣政末登進士第歸朝

預銓調碌碌州縣年六十餘始入翰林充修撰  
出守武遂終于忻州刺史皖城有玉照鄉既老  
號玉照老人示不忘本云

次韻彥高即事

福威看幾落筆削在麟經中道亡三鑑危時憶九齡網  
羅無處避輦鼓不堪聽身遠遼陽渡心懷峴首亭脫巾  
頭半白傾蓋眼誰青斷鴈西風急潸然涕泗零

順安辭呈趙使君二首

太平時世屢豐年勝事空聞父老傳  
郭外桑麻知幾頃  
船頭魚蟹不論錢

六朝興廢渡河年舊國歸來更黯然  
八月邊城山未雪  
蘆花籍籍已漫天

次韻王子慎玉田道中一首兼呈韓公美閣老

東晉風流屬子猷開元峭直讓韓休  
絲綸對掌驚三雋  
尊酒更酬失四愁  
古道陰陰槐樹老  
歸鴻杳杳荻花秋  
浩然酒思天涯遠  
月滿江南小謝樓

出榆關

羽檄中原滿萍流四海間少時過桂嶺壯歲出榆關  
竒禍心如折羈愁鬢已斑楚纍千萬億知有幾人還

渡遼

身隔遼東渡心懷冀北羣會歸蘇屬國却憶范將軍  
風陣橫秋鴈雷聲吼夜蚊方言莫相笑唐梵本殊分

至日

亂離南國忽經年一線愁添未死前心折靈臺候雲物

眼看東海變桑田  
燕巢幕上終非計  
雉畜樊中政可憐  
安得絕雲行九萬  
却騎鯨背上青天

次韻彥高暮春書事

戊申歲

平生漫浪老清暉  
却掃丘園屬少微  
世亂傷心青眼舊  
天涯流淚白雲飛  
羈愁只憶中山酒  
貧病長懸子夏衣  
澤畔行吟誰念我  
祇應形影自相依

寄題張浩然松雪樓

八座山光秀玉柯  
岸中絕景意如何  
瘦來豈為寒松句

和寡還驚白雪歌地近雲烟來鶴駕簷高星斗瀉銀河  
懸知老子登臨處渺渺滄波月色多

次韻彥高占雪

天秋鼓南風雲海飄暮雪三春猶冱寒九夏那苦熱土  
圭測中氣嘗聞先儒說窮髮多異宜泥古誠亦拙吳侯  
擅六藝名宦端不屑晚歲登泰山蚤已探禹穴千歲可  
坐致不待數旬月重陰畏坎陷五陽欣夬決君子方履  
霜渠肯蹈覆轍雞猪與魚蒜幸可充朝餽



枕上言懷

九土將分裂中原政擾攘孰為真漢相却憶假齊王晉  
室遷神鼎梁園作戰場可憐羈客夢夜夜在家鄉

再和彥高

否泰由來在歲星誰聽叩角作商聲一朝漢魏成今古  
百口燕秦隔死生雉堞僅能逃病婦鴈書猶記托難兄  
雪雲埋盡遼西路有酒如淮奈此情

聞鴈

千里寒雲卷朔風  
當軒月午鴈書空  
煩君為報江南客  
顛顛遼東更向東

閨情二絕

己酉  
歲

天邊北斗又回春  
愁絕龍沙任酒醺  
萬里巫山歸夢斷  
不知何處覓行雲

蕙帳金爐冷篆烟  
故山春草幾芊芊  
只今唯有瀟湘月  
萬里相隨照不眠

過白溝赴順安

萬折狂瀾肯倒流  
歸心夢寐在東周  
平生快意君知否  
今日驅車過白溝

題御城寺壁

一徑埋雲草樹荒  
石麟蒼蘚卧田桑  
漢家陵闕今何在  
洛水嵩山滿夕陽

月夜汎舟

浮世渾如出岫雲  
南朝詞客北朝臣  
傳郵擾擾無虛日  
吏俗區區老却人  
人眼青山看不厭  
傍船白鷺自相親

舉杯更欲邀明月暫向堯封作逸民

病中寄楚卿

月滿江樓午夜鐘多情多病一衰翁行雲不道無行雨  
只恐相逢是夢中

送客亭

十年羈旅鬢成絲千里淮山信息稀送盡長亭短亭客  
且看莊鳥幾時歸

病中言懷呈韓給事

潦倒淮山客金臺五見秋  
退飛嗟宋鷁畏暑甚吳牛  
問疾憐摩詰分曹類子猷  
自慙無補報只合隱林丘

伯堅惠新茶綠橘香味郁然便如一到江湖之上  
戲作小詩二首

建溪玉餅號無雙雙井為奴日鑄降  
忽聽松風翻蟹眼却疑春雪落寒江

黃苞猶帶洞庭霜袖傳看綠葉香  
何待封題三百顆只今詩思滿江鄉

文季侍郎得綠萼香梅子文待制有詩輒亦同賦  
一枝綠萼冠羣芳瀟灑猶疑楚岸傍香骨瘦來冰蕊細  
夢魂清處月波涼賡酬便合成千首醒醉寧須計百觴  
橫玉叫雲吹不盡只教今古洗離腸

施內翰宜生

四首 補三首

宜生字明望浦城人宣和末為潁州教官仕齊  
仕國朝官至翰林學士自號三住老人有集行  
於世賦柳云朱門處處臨官道流水年年遶禁

宮草書云臨池翕忽雲霧集舞劍浩蕩波濤翻  
山谷草書云行所當行止當止錯落中間有條  
理意溢毫揺手不知心自書空不書紙社日云  
濁澗迴湍激青烟弄晚暉綠隨春酒熟分與故  
山違社鼓喧林莽孤城隱翠微山花羞未發燕  
子喜先歸又云割少詼諧語分均宰制功靈祇  
依古樹醉叟泥村童萬里開耕稼三時順雨風  
行春從此樂著意酒杯中初在潁州日從趙德

麟游頗得蘇門沾丐云

補金史宜生為宋潁州教授以罪北走海陵召  
為翰林直學士遷翰林侍講學士為宋正旦使  
宜生自以得罪北走耻見宋人力辭不許宋命  
張燾館之都亭因間以首丘諷之宜生顧其价  
不在旁為廋語曰今日北風甚勁又取儿間筆  
扣之曰筆來筆來於是宋始做其副使耶律必  
埒哩使還以聞坐是烹死先是宜生困於場屋



遇僧善風鑑謂之曰子面有權骨可公可卿而  
視子身之毛皆逆上且覆腕必有以合乎此而  
後可貴也宜生聞其言大喜竟從范汝為於建  
劍已而汝為敗變服為傭傭泰之吳翁家三年  
翁異之一日屏人詰其姓名宜生曰我服傭事  
唯謹主人乃亦致疑耶翁固詰之則請其故翁  
曰日者燕客執事咸餒而汝獨遜諸儕且撒器  
有歎聲是以識汝非真傭也宜生遂告之故翁

瞞之金夜濟淮以歸試一日獲三十六熊賦擢  
第一其後竟如僧言

柳

魏王堤暗雨垂垂還似春殘欲別時傳語西風且停待  
黛殘黃淺不禁吹

無題

唱得新翻穩貼腔阿誰能得肯雙雙天寧寺裏尊前月  
分擘清寒入小牕

盆池

盆池漱灑蔭芭蕉，點水圓荷未出條。  
分得江湖好風景，斷雲飛去晚蕭蕭。

平陽書事

春寒宰宰透春衣，沿路看花緩轡歸。  
穿過水雲深密處，馬前蝴蝶作團飛。

題平沙落鴈

塞鴻橫天三兩行，欲下未下先悠揚。  
平田到處菰蒲美，

託身何必來瀟湘

題都亭驛

江梅的皜未全開老倦無心上將臺人在江南望江北  
斷鴻聲裏送潮來

含笑花

百步清香透玉肌滿堂皓齒轉明眉  
褰帷跛客相迎處射雉春風得意時

附貴耳集施宜生改名方人也入大金曾為奉

使來館伴因語三十六熊賦云雲屯八百萬騎  
以八百萬騎對三十六熊何其鮮哉宜生語塞  
大抵南北二使皆不深書司射所載熊即侯也  
非獸也

附金詩紀事案遼史興宗重熙五年九月癸巳  
獵黃華山獲熊三十六冬十月壬子御元和殿  
以日射三十六熊賦試進士於廷則此賦乃遼  
時舊題海陵朝適有此相同之事故即用以試

士耳

附晦庵詩話龍泉尉施慶之常舉宜生十數詩  
內八使時題都亭驛云云

附癸辛雜識汴梁普賢洞記石碑甚雅金皇統  
四年四月一日奉議大夫行臺吏部郎中飛騎  
尉施宜生撰并書所謂方人也者後為金相字  
步驟東坡

御訂金定詩增補中州集卷七

欽定四庫全書

御訂全金詩增補中州集卷八

大家二人

承旨党懷英

六十五首

補二首

公諱懷英字世傑宋太尉進之十一代孫父純  
睦自馮翊來以從仕郎為泰安軍錄事叅軍卒  
官妻子不能歸遂為奉符人公之在孕也太夫  
人夢道士吳筠來託宿及公生儀觀秀整如神

仙然少穎悟日授千餘言師亳社劉巖老濟南  
辛幼安其同舍生也嘗試東府取解魁是後困  
於名場遂不以世務嬰懷放浪山水間詩酒自  
娛簞瓢屢空晏如也夫人石氏徂徠先生之後  
亦能安貧守分既久鄉豪傑有知公者稍料理  
之大定十年擢進士甲科調成陽軍事判官汝  
陰令人為史館編修應奉翰林學士出為大定  
軍節度使為政寬簡不言而人化召為翰林學



士承旨致仕大安三年九月年七十八終於家  
是夕有大星隕於所居之堂衆驚視之而公已  
逝矣諡曰文獻禮部間開公墓誌云公之文似  
歐公不為尖新奇險之語詩似陶謝奄有魏晉  
篆籀入神李陽冰之後一人而已嘗謂唐人韓  
蔡不通字學八分自篆籀中來故公書上軋鍾  
蔡其下不論也小楷如虞褚亦當為中朝第一  
書法以魯公為正抑誠懸以下不論也古人名

一藝而公獨兼之可謂全矣

皇叔永蹈伏誅公作詔云天下一家

詎可窺於神器公族三宥卒莫違於常刑非忘本根骨肉之情蓋為宗社安危之計亦由涼德有夫睦親乃於間歲之中連致逆謀之起思以義掩至於重典之亟行天高聽卑殆非此心之得已興言及此慨嘆奚窮論者謂公之制誥百年以來亦當為第一間間公作碑偶不及此故表出之

補歸潛志党承旨懷英與辛尚書棄疾俱山東人少同舍屬金國初遭亂俱在兵間辛一旦率數千騎南渡顯於宋党在北方擢第八翰林有

名為一時文字宗主二公雖所取不同皆有功  
業寵榮視前朝陶穀韓熙載亦相況也後辛退  
間有詞鷓鴣天云壯歲旌旗擁萬夫錦韉突騎  
渡江初燕兵夜捉銀胡矛漢箭朝飛金僕姑思  
往事歎今吾春風不染白髭鬚都將萬字平戎  
策換得東郊種樹書蓋紀其少時事也

補金史懷英與郝侯充遼史刊修官應奉翰林  
文字伊喇益趙溲等七人為編修官凡民間遼

時碑銘墓誌及諸家文集或記憶遼時舊事悉送官是時章宗初即位好尚文辭旁求文學之士以備侍從謂宰臣曰翰林缺人如之何張汝霖對曰郝俟能屬文宦業亦佳上曰近日制詔唯党懷英最善伊喇履進曰進士擢第後更不讀書近日始知為學矣上曰近日進士甚減裂唐書中事亦多不知朕殆不喜上謂宰臣曰郝俟賦詩頗佳舊時劉迎能之李晏不及也明昌

元年懷英再遷國子祭酒六年有事於南郊懷  
英攝中書侍郎讀祝冊上曰讀冊至朕名聲微  
下雖曰尊君然在郊廟禮非所宜當平讀之泰  
和元年增修遼史官三員詔分紀志列傳刊修  
官有改除者以書自隨久之懷英致仕章宗詔  
直學士陳大任繼成遼史云

附趙秉文題竹溪黃山書竹溪先生篆第一八  
分次之正書又次之皆當為本朝第一黃山先

生擘窠大字體兼顏蘇畫畫雄秀當在石曼卿  
之上草書如行雲流水當在蘇才翁黃魯直伯  
仲間非但不愧之而已

穆陵道中二首

沂山一何高羣峰鬱孱顏我行問遺老云此小泰山望  
秩有常祀其神號東安草荒穆妃墳雨剝漢武壇神仙  
果何在可想不可攀千年等一昔俯仰悲人寰東望蓬  
萊宮咫尺滄波間

重山復峻嶺溪路宛盤盤流水滑無聲暗瀉溪石間岸  
草淒以碧鮮葩耀紅丹高雲映朝日流景青林端我行  
屬朱夏欲渴不得間山中有佳人風生松桂寒

瓊花木后土像

皇媧化萬象賦受無竒偏胡為墮愛境亦為尤物牽煌  
煌靈祠花玉蘂冠春妍婉如傾國妹獨立江湖邊顧昔  
誰所移含秀梁宮烟青黃竟自寇始信擁腫全珍材歸  
好事肌理緻且堅琢刻方寸餘遺像規汾孺願言稅靈

馭要復安所憐神游妙難詰豈以大小懸槐根開夢國  
插實游基仙靜想寶龕中坐納東南天況有大者存指  
顧超八埏

君錫生子四月八日

左君錫蒞  
北名士

堂前種護憂可忘不如生兒喜殊常嘔啞啼笑彩衣側  
滿堂和氣生嘉祥燕寢香凝佳夢兆與佛同生佛親抱  
我來初見出錦綳肌肉照人眉宇好世間兒子空紛紛  
如君此兒真慰人薊山東盤出英秀政與德門宜子孫



天馬駒海鶴子氣骨初成便超異  
籟雲沖霄從此始

立春

水結東溪凍未漪  
風凌枯木怒猶威  
不知春力來多少  
便有青蠅負暖飛

端午日照道中

幾年客舍逢端午  
今日東行復海隅  
三歲已無平老艾  
一杯聊作辟愁符

夏日道出天封寺

疊澗重岡掩復開鳥啼人寂路縈回微涼暫逐行雲過  
細雨俄從遠樹來世事自嗟吾老矣山僧那識興悠哉  
婆婆十畝溪橋撥藉汝清陰感不材

龍池春興

三十餘年惜別心重來獨興此登臨佳人何在暮雲合  
遊子不歸春草深曲檻凭欄花冪冪扁舟繫岸柳陰陰  
避人白鳥忽驚去雙影飛翻明翠岑

宿宣灣

清潁去無極悠悠楚甸深人家半臨水村徑曲穿林積  
雨猶行潦荒烟易夕陰夜涼淮浦月寂寞照邊心

黃彌守畫吳江新霽圖

江雲卷宿雨江風散晨烟山光烟雨潤欲滴影墮江水  
空明間修蛾新妝翠連娟下拂塵鏡窺明蠲漁舟來何  
許觸破青茫然中流水肥魚逆上受網應有松鱸鮮藉  
問張季鷹西風幾時還魚郎理網喚不應但見水碧江  
涵天如何塵埃中眼界有許寬道人胸次陂萬頃為寫

此境清而妍蒼崖無塵樹影寒直欲坐我苔磯邊我家  
竹溪陰小艇橫清漣異時赤脚踏兩舷不應尚作披圖  
看

雪中四首

詩人固多貧深居隱茅蓬一夕忽富貴獨卧瓊瑤宮夢  
破牕明虛開門雪迷空蕭然視四壁還與嚮也同閉門  
捫鬚坐愈覺生理窮天公巧相幻要我齊窮通衝寒起  
沽酒一洗芥蒂胸

翻翻雪中鴉飛鳴覓遺粟雪深不可求  
遠屋啄寒玉顧我如鴟鳶多儲有餘肉  
我亦生理拙凍卧僵雪屋日午甑無烟  
饑吟攪空腹豈不知屠沽肥甘隨取足  
幸待春雪消吾猶多杞菊

歲晏苦風雪曠野寒崢嶸滋薪燒枯棘  
距刺相拏撐濃烟久伊鬱微焰方晶瑩  
津津膏乳漲中有蚯蚓鳴蓬蒿掇快炬  
條作飛灰輕餘暖未及愜睫淚先已盈  
幸有鄰家酒時澆肌粟平

歲晏雪盈尺農夫倍欣然不作祁寒怨應知有豐年笑  
我寄一室歸耕無寸田無田吾不憂飲啄當問天我看  
多田翁租賦常逋懸低頭負呵責顏色慘可憐不如拾  
滯穗行歌兩無牽

雪

寶花天雨曉紛紛佛界莊嚴盡白銀待臘風雲初接勢  
犯寒糟麴若為神園中芳草誰能賦江上梅花獨自春  
半臂騎驢得佳句九原誰喚灞陵人

蟬

槁壤陰潛罷轉丸  
飄飄便作飲風仙  
幽叢何處拳枯蛻  
別樹還來續斷絃  
小院日長清夢覺  
空庭人靜綠陰圓  
無情物化誰能料  
獨撥羈懷一慨然

漁村詩話圖

江村清境皆畫本  
畫裏更傳詩語工  
漁父自醒還自醉  
不知身在畫圖中

曉雲次子端韻

灤溪經雨浪生花  
曉碧翻光漾  
曉霞川上風  
烟無定態  
盡供新意與詩家

送高智叔歸濟南

已作西溪約  
還為汶上行  
漂流知分際  
會合見平生  
旅枕勞歸夢  
家山入去程  
空齋桃李月  
寂寞照清明

日照道中

路轉清溪樹蔚然  
解鞍坐榻午陰圓  
避人鷗鳥驚飛盡  
時有遊魚弄柳綿



夜發蔡口

落霞墮秋水浮光照船明孤程發晚泊倦揖揺天星藹  
藹野烟合脩脩水風生遠浦浩渺潏微波澹彭觥畸鳥  
有時起幽蟲亦宵征懷役歎獨邁感物傷旅情夜久月  
窺席忼慨心未平

西湖晚菊

重湖滙城曲佳菊被水涯高寒逼素秋無人自芳菲鮮  
飈散幽馥晴露墮餘滋蹊荒綠苔合采采歎後時古瓶

貯清泚芳樽湔塵霏遠懷淵明賢獨往誰與期裴徊東  
籬月歲晏有餘悲

西湖芙蓉

林颺振危柯野露委荒蔓孤芳為誰妍一笑聊自獻明  
妝炫朝麗醉態羞晚困脉脉懷春情悄悄驚愁怨豈無  
桃李媒不嫁惜嬋媛悠哉清霜暮共抱蘭菊恨

浪溪別吳安雅

浪音  
郎

浪水清且白頻年照行役褰裳涉微波微波去無極悠

悠溪上山送我往復還與君臨水別幽恨寄山間

奉使行高郵道中二首

野雪來無際風檣岸轉迷潮吐淮澤小雲抱楚天低鐘  
鞞船鳴浪聯翩路牽泥林鳥亦驚起夜半傍人啼

細雪吹仍急凝雲凍未開牽間時掠水帆飽不依挽岸  
引枯蒲去天將遠樹來行舟避龍節處處隱漁隈

孤鴈集句

萬里銜蘆至寒空半有無踪分沙岸靜聲入塞垣孤影

早衝關月飛高望海隅不知天外侶何處下平蕪

黃菊集句

九月欲將盡鮮鮮金作堆  
遠籬殘艷密擁鼻細香來  
五色中偏貴羣花落始開  
可憐陶靖節共此一傾杯

金山

我從渡淮涉高郵雪風連日吹行舟  
維揚地西闕夜色星月隱見邊  
城樓晴光破曉射瓜步照耀玉宇開  
瓊洲馮夷收威浪妥帖容我一到金山頭  
金山勝槩冠吳楚

萬礎蟠峙江中流平生夢寐不到處乃以王事從私遊  
鍾山雨花落眼底海門鶴崖波際浮川開林闔望不極  
但見遠色明輕鷗風烟渺漭異吾土行役有程難久留  
一杯未舉帆影轉已看浙樹捎旗旒

趙飛燕寫真

昭陽宮裏千蛾眉中有一人輕欲飛姊妹黃緣特新寵  
六宮鉛粉無光輝春回太液花如繡花底輕風扶翠袖  
君恩不許作飛仙裝積宮裙留淺皺君王貪宴溫柔鄉

木門不省搖倉琅避風臺成畧今古空使遺妬驚霓裳  
當年傾城復傾國誰寫餘妍入丹碧背燈擁髻一潸然  
不應尚有樊通德

村齋遣事

人生天地真蘆物外擾擾吾何須與其羈馵齊轅駒  
豈若飲翫隨駘駑不知掉尾忘江湖响响濡沫胡為乎  
誰念挾卷矜村墟磨丹黝圍樵蘇申鞭示箠嚴範摸  
矍如狙翁調衆狙爾雅細碎編蟲魚辭嚴義密字見踈

烘齋睥睨音語麤諷誦誰敢忘須臾萬中有一差錙銖  
呶啞坐使為呻呼咄哉倡言口囁嚅等為兒戲夫何殊  
霜風入戶寒割膚生薪搓牙供燎爐漫漫滋烟迷四隅  
白鶴日見黔如烏此間縱樂能何如其誰相與歌歸歟  
投籠嗟我自縶拘垂翅更待窮年徂

和張德遠伐松之什

社櫟賦散材乃遭匠石嗤高梧中宮徵不能保孫枝全  
傷隨用否理固不可移堂堂十八公端勁出天姿蟠根

藉餘潤茂鬱清溪湄雨師夜失律偶此遺神螭烟鱗漬  
寒雨霧鬣明朝曦騰拏困愈壯偃蹇僵不疲未能走沉  
泝聊與草木嬉長風動頭角吟嘯舒鬱伊塵埃詎能久  
雷電會有時昨宵卧溪月老影間橫歌天明竟不舉俯  
仰益怪竒拏拳攀半崖渴喙吞清漪希珍價不售復病  
樵柯危材高輒爾耳咄彼造化兒膠枝飽霜雪遽與蓬  
蒿衰孤標挽萬牛未為廊廟知窈窕桃李春奈爾千歲  
期枯桑豈自賈取敗以老龜茲非爨下材梁棟終見施



長短歸自然勿為鳧鶴悲

題獐猿圖

雲山空岡阜重榭葉半濕新霜紅溪猿得意適其適間  
攀靜挂晴光中孤麕何從來寂歷野竹風舉頭相視不  
相測昂藏却立如癡童鯤鵬負雲天斥鷃處蒿蓬萬生  
所樂自不同忽然胡為之二蟲

和濟倅劉公傷秋

川流為瀦鉅野濶水色天容兩開豁山隨水遠勢奔鶩

駿馬西來銜轡脫山前雲木散不收坐看木末來歸舟  
秋容澄明納萬象畫本寂默橫雙眸謫仙曾來釣烟磧  
想見夕陽寒影隻騎鯨去作汗漫遊只有荒臺壓澄碧  
臺邊昨夜西風來倦遊羈宦心悠哉豈無瓊艘百拖載  
春色是中可以忘形骸官居得秋况不惡高吟何遽悲  
搖落君不見中郎詩翰憶湖山秋色正滿連雲閣

題春雲出谷圖

春雲乍出山有無春雲已去春山孤山光空濛不可寫

正要雲氣相縈紆  
山吞雲吐變明晦  
半與巖谷生朝晡  
輕林蕭蕭暗溪樹  
餘影漠漠開樵居  
舟人艤棹並沙尾  
坐看縹緲搖空虛  
巧分天趣出畫外  
韻遠不與丹青俱  
今人重古不知畫  
但愛屋漏烟煤汙  
惜哉東坡不及見

此本詩中獨有疊嶂烟江圖

輕林蕭蕭一作輕陰霏霏

### 新泰縣環翠亭

官居坐官府不見青山青  
閒來亭上看青山遠  
重城左見青山縱  
右見青山橫  
具教浮虛碧  
崢嶸羣峯連娟相

繚縈縣庭無事苔蘚生獨携珍琴寫溪聲琴聲鏘鏘激  
虛亭罷琴舉酒招山英山英莫相嘲我雖朝市如林垆  
客有山中來聞說令尹清山英異時合有情周遮不放  
公馬行

喜雨

山雲駛如驅山雨沛如傾幽人夢初醒卧聽簷溜聲雷  
霆怒相搏似與陰陽爭蛟龍久何蟠始此幽蟄驚餘花  
曉猶落竟日方破晴明朝東臯望照眼生意明焦枯被

沾濡相與迴春榮  
忻然野桃李新綠  
棲殘英漸漸麥隴  
翠溜溜溪流清蛙  
鳥亦解喜飛沈互  
喧鳴萬物皆得時  
棲遲感吾生直應  
挂儒冠便逐春農  
耕

睡覺門外月色如晝  
霜風過琴然成聲作一絕

老木經霜衆竅空  
月明深夜響秋風  
始知天籟非人籟  
吹萬由來果不同

題張維中華山圖

汝珠散遺曹我姓  
出馮翊空聞華山名  
未始見顏色三

峯擢觚稜經眼但石刻那知玉井蓮香落清渭北巔崖  
劃變轉勢走關輔窄豈無愛山人不解傅粉墨多才曲  
江喬公暇日招揖歸裝貯新圖尚帶烟霞濕明牕一傳  
玩恍若到鄉國我生隨宦遊久作東南客有田泰山下  
繞屋皆泉石懷恩戀官廩老大歸未得況復琴川遙便  
恐此生隔峻嶒蒼烟面只許畫中識詩成持送君想像  
三歎息

題馬賁畫鴻鴻圖

雙眠雙浴水平溪，共看秋光卧兩堤。  
誰信瀟湘有孤鴈，冷沙寒葦不成棲。

書因叔北軒壁

生涯自分老林泉，欲止還行信有緣。  
未許綸竿歸醉手，且教烟水入吟鞭。  
雲山聊欲追聲叟，風腋何妨借玉川。  
獨卧北軒元不寐，竹間寒雨夜琅然。

和元卿郊行

馬駛車馳起路塵，傍山陰翳作春溫。  
東風欲放萌芽動，

已有疲牛啣燒痕

世華將有登州之行作是詩以送之

少陵兄弟蓋三人坡老相知只卯君五畝有期將共隱  
一樽何易便輕分秋鴻渺渺看孤往夜雨瀟瀟忍獨聞  
他日書來問無恙我應深釣竹溪雲

濰密道中懷古

十二全齊勢興亡俯仰中地傾濰水北山斷穆陵東破  
塚餘殘甃荒蹊足轉蓬燕齊舊懸隔不接馬牛風



過蒙黎溝

地僻人烟少山深澗谷重坡陀下長坂逆遷失諸峯問  
俗知懷土聽歌識相春幾家茅屋外田畝自衡從

昫山驛亭阻雨

東海地名蒼梧舊說云此島自蒼梧浮來又州有景疏樓

脫葉蕭蕭山木稠連檣飄汎海蓬秋浪回昫島馮夷舞  
雲暗蒼梧帝子愁欲往未行淹僕馬乍來還去羨鷓鴣  
景疏樓下無邊水暫濯塵纓可自由

弔石曼卿

曼卿嘗通守昫山遣人以泥封桃李核彈之巖石間其後花開滿山又嘗攜妓

飲山之石室間鳴  
琴為冰車鐵馬聲

城頭山色翠玲瓏尚憶清狂四飲翁  
鐵馬冰車斷遺響  
桃花石室自春風平生詩價千鈞重  
身後仙遊一夢空  
想見蓬萊水清淺芙蓉城闕五雲中

晌山道中三首

二年三到水雲鄉瘦馬凌兢怯路長  
野雪未乾春未雨  
落鳶飛起暗塵黃

吳歌楚語海山間織葦苦菰便自安  
已作稻塍猶未種

小溝流澀水車乾

海路東南萬壑傾青山孤起壓重城驛亭春半餘寒雪  
牆角無人草自生

應制粉紅雙頭牡丹二首

卿雲分韻兩嫣然鏡裏妝成穀雨天曉日倚闌間妬豔  
春風拾翠兩駢肩水南水北何曾見桃葉桃根本自仙  
夢想沈香亭北檻畧修花譜記芳妍

春意應嫌芍藥遲一枝分秀伴雙鞋並肩翠袖初酣酒

對鏡紅妝欲鬪奇  
上苑風烟工獻巧  
中天雨露本無私  
更看散作人間瑞  
萬里黃雲麥兩岐

次文孺韻

病眼花生紙羈懷  
棘遶牆挑燈簷溜急  
到枕漏聲長響徹  
雞埒曙寒迎鴈背  
霜淒涼三徑菊無夢  
到壺觴

好問按此

詩是貢院中唱和故有  
花生紙棘遶牆之句

白莊道中

暖風遲日弄春晴  
渾似龍眠畫裏行  
沙路半隨堤尾曲

幾家桃李鶻鳩鳴

花品

翠裙襞積破黃薇新樣丁香結玉蕤最愛東風木芍藥  
淡紅深紫兩相宜

書扇後

便面團圞字點鴉天風吹墮委塵沙燕泥庭草爭工拙  
何似當年陌上花

送崔深道東歸

君從鬱葱幾時來鬱葱山色空崔嵬白雲已自動歸意  
蟪蛄蚱蜢況可懷薰風濁酒非莓苔那知空齋響蚊雷  
酒酣臨風解相憶喚取玉笛傳清哀

和道彥至

山光凝黛水浮空地僻偏宜叔夜慵尚喜年登更冬暖  
敢論人厄與天窮君方有志三重浪我已無心萬里風  
擬葺小園師老圃綠畦春溜引連筒

楚清之畫樂天小娃撐小艇偷採白蓮回不解藏

蹤跡浮萍一道開詩因題其後

樂天歸卧湖山邊  
閒買池塘娛暮年  
小蠻已老樊素去  
心地玲瓏如白蓮  
室中誰遣散花天  
故點禪衣香破禪  
鴛鴦為報竊花處  
題詩耍戲小嬋娟  
紅妝秋水照明蠟  
清之粉本清且妍  
道人無心被花惱  
對畫作詩真適然  
君不見元亮投名蓮  
社裏不妨更賦閒  
情篇

寄賈因叔

鶉居穀食兩迷陽  
四十猶貪桂子香  
汶水即今拋歲月

顯陵回首見冰霜  
蟲魚細碎成書癖  
荆棘崢嶸失醉鄉  
舉白北軒真一夢  
竹間猶記雨浪浪

題大理評事王元老雙橘堂

朱橘復朱橘  
傳分包貢實  
煌煌中堂榜  
竒畫照公堂  
前護草碧  
公今致養豐  
祿食更取蠻  
珍奉顏色  
舉觴一笑  
三十秋  
坐看諸孫  
索梨栗

宿舊縣四更而歸道中撫所見作行路難

三星排空山月明  
思歸客子夜半行  
單衣短褐風淒清



響踏黃葉棲禽驚忽忽曉轉沙岸側枯蓼寒蘆鳴索率  
山月欲墮山烟黑前途無人脚無力行路難堪歎息

途中

壬辰正月

平明發郊墟獨步踰蹠蹠引領望前程日出烟未滅林  
迴鳥始喧麥短牛已啣春陽氣未壯道左尚殘雪長風  
拂歸袂凜欲變冬冽指凍僵不拳膠凝仍欲折而我竟  
何事犯此寒正切修途去未幾行意先已蕪安得兩翼  
生高飛度林樾

徐茂宗蝸舍

萬生擾擾安其安  
鸞鳩不羨鵬飛搏  
端知扶搖上九萬  
無異跳躍蓬蒿間  
是身江湖一漂粟  
身外紛紛皆外物  
一屨儻可容所寓  
何用渠渠作高屋  
知君從道由心成  
昔焉忘俗今忘形  
物來弭角不知競  
觸蠻血戰良虛名  
我夢敲門訪君舍  
舍小不容相對話  
覺來驚見壁間蝸  
俯仰人間真物化

壬辰二月六日夜夢作一絕句其詞曰  
矯冗連天

花春風動光華人眠不知眠我佩絳紅霞夢中自  
以為竒絕覺而思之不能自曉故作是詩以紀之  
夢中作詩真何詩夢中自謂清且竒覺來反覆深諷味  
字偏句異誠難知豈非夢語本真語無乃造物為予嬉  
君不見莊周古達士栩栩尚作蝴蝶飛我生開眼尚如  
此況在合眼夫何疑

謁孔林一首

魯國遺蹤墮渺茫獨餘林廟壓城荒梅梁分曙霞棲影

松牖回春月駐光老檜曾霑周雨露斷碑猶是漢文章  
不須更問傳家遠泰岱參天汶泗長

題王廣道環翠堂

誅茅結構畧三楹顧揖青山共落成一逕宛如通輞口  
甘岑何用詫南城清風枕簟人間世黃卷聖賢天下名  
只恐山靈留不得暮年合起為蒼生

附趙秉文竹溪篆跋李監之篆蔡中郎之八分  
虞永興之小楷陶謝之詩六一公之文妙絕一

世公兼而有之抑可謂全矣後數百年不幸文字散落獨此篆存亦足以知予言之不妄

附元胡祗適題党懷英八分書文章與時高下唐不如漢漢不如三代党竹溪在金朝為第一流方之梁鵠蔡邕鍾繇一何遼哉僅能得韓擇木之髣髴耳

附趙秉文翰林學士承旨文獻党公碑先秦古文篆籀淳古簡嚴後世邈乎不可及已漢之文

章溫淳深厚如折枯跡以為明堂之楹駕馭驥  
以遵五達之衢不憂傾覆使人曉然知治道之  
歸韓文公之文汪洋大肆如長江大河渾浩運  
轉不見涯涘使人愕然不敢睨視歐陽公之文  
如春風和氣鼓舞動盪了無痕迹使人讀之疊  
疊不厭凡此皆文章正宗也至於書亦然秦相  
李監之篆漢魏之八分虞褚魯公之楷見者莫  
不歛衽而敬其下作者如零珠片玉非無可喜

要非書法之正也本朝百餘年間以文章先稱者皇統間宇文公大定間無可蔡公明昌間則党公於時趙黃山王黃華俱以詩翰名世至論得古人之正脉者尤以公為稱首公諱懷英字世傑泰安州奉符人少穎悟日誦千餘言及壯以文名天下書法上軋鍾蔡小楷如虞褚當為中朝第一古人名一藝公獨兼之可謂全矣銘曰文章非能為之為工乃不能不為之為工也

非要之必竒要之不得不然之為竒也譬如山  
水之狀烟雲之姿風鼓石激然後千變萬化不  
可端倪此先生之文與先生之詩也至於篆籀  
之妙後數百歲復有一陽冰則不可知後數百  
歲無復一陽冰則書止於斯噫

附元王暉跋竹溪所題東坡墨戲後竹溪書所  
見多矣未有若此帖之真楷蕭散者大似虞中  
舍諫獵奏狀間以側筆學坡之媚耳乃知公當



大定明昌間不只以篆籀獨步於玉堂金馬矣  
輔之韞擯愛玩亦醉翁之意也可謂真知賞音  
者哉

附太平清話党懷英善屬文尤工篆籀當時稱  
為第一今可見者闕里杏壇二大字岱祠碑額  
魯兩先生碑東昌府學三絕碑

附續夷堅志承旨党公初在孕其母夢唐道士  
吳筠來託宿為人儀觀秀整望之如神仙在西

掖三十年以承旨致仕大安三年九月十八終  
於家是夕有大星隕於居東坡謂韓退之生也  
有自來而逝也有所為以公生死之際觀之亦  
可以無愧斯語矣

附堯山堂外紀党懷英字世傑號竹谿與濟南  
辛幼安同師蔡伯堅筮仕決以著辛得離決意  
南歸党得坎遂留事金

附香祖筆記金翰林趙秉文嘗述党懷英論詩

云律詩最難工五十六字皆如聖賢中有一字  
不經鑪錘便如一屠沽兒廁其間也按此五代  
人劉昭禹語党述之耳

御訂全金詩增補中州集卷八